

元史

三

无

史

三

元史類編卷之四

仁和邵遠平戒山學 南沙席世臣郢客氏校刊

天王二

成宗皇帝諱鐵穆耳世祖之孫太子真金第三子母曰宏吉剌氏
以至元二年九月庚子生帝二十二年太子薨二十五年世祖命
帝討叛王合丹削平遼左諸部三十年受皇太子寶撫軍北邊明
年甲午春正月世祖崩諸王大臣遣使訃軍中夏四月壬午帝至
上都左右部諸王畢會先是御史中丞崔彧得玉璽于故臣之家
監察御史楊桓辨其文曰受命于天既壽永昌上之帝母元妃羣
臣咸曰神寶之出實當宮車晏駕之後此天意屬于皇太孫也至
是手授帝甲午帝卽位百官朝于大安閣詔曰朕惟太祖聖武皇
帝受天明命肇造區夏列聖相承光熙前緒追我先皇帝體元居

正以來文物典章大備臨御三十五年薄海內外罔不臣屬宏規
遠畧厚澤深仁有以衍皇元萬世無疆之祚我昭考早正儲位德
盛功隆天不假年四海缺望顧惟眇質仰荷先皇殊眷往歲之夏
親授皇太子寶付以撫軍之任今春宮車遠馭奄棄臣民乃有宗
藩昆弟之賢戚畹官僚之舊謂祖訓不可以違神器不可以曠體
承先帝夙昔付託之意合辭推戴情切意堅朕勉徇所請于四月
日卽皇帝位可大赦天下尚念先朝庶政悉有成規惟慎奉行罔
敢失墜更賴宗親勲戚左右忠良各盡乃誠以輔台德按元文類作王構撰張伯淳養
蒙集亦載之追尊皇考曰皇帝尊母元妃曰皇太后庚子遣攝太尉元都

帶爲大行皇帝請諡于南郊

志作甲辰日事此告天請諡之始

定諸王駙馬賜與依往

年大會例賜金一者加四爲五銀一者加二爲三戊申太白晝見
已酉雲南行省以所定路府州縣來上上路二下路十一下州四

十九中縣一下縣五十授金齒土官阿魯爲孟定路總管五月庚戌朔太白犯輿鬼壬子祭太陽太歲火土等星于司天臺紫微星于雲僊臺戊午上大行皇帝尊諡冊曰繼志述事非盡孝無以致其誠表行誅功非定諡無以稱其實肆邦彛之具舉維天道之協從欽惟先皇帝膺籙受圖體元立統蚤從藩邸茂著徽稱爲治之基有常經國之畧則遠役用衆智獨斷于衷總攬萬幾如指諸掌內朝廷外侯牧等威迭降罔不適中先教化後刑名本末相循悉皆有序在御迨踰于三紀推尊合冠于百王若夫惠及困窮恩加降附慎終如始無非好生之心保小以仁特示包荒之量擴盛猷之鴻鬯沛膏澤之醇醲方其泰運漸亨戢濟多難離綱復綴混一四方傳檄而氛祲開渙號而方維定乾旋坤轉不足喻其機雷厲風飛不足比其捷至于嘉言博采惟典謨訓誥是師諸藝畢延盡

陰陽圖緯之學考音律以創字畫參古今以制禮儀振耀威靈肅
陳兵衛白旄黃鉞時則親巡犀甲雕弧止于不用聖德弗可及已
神功茂以尚焉蓋文之所加者深武之所服者大是用升崇吉祔
揆卜剛辰謹奉冊寶上尊諡曰聖德神功文武皇帝廟號世祖伏
惟睿靈俯垂昭鑒思皇多祐申錫無疆

見元文類
王構撰

并上世祖后尊諡

曰昭睿順聖皇后又上皇考尊諡冊曰周武膺符首建文王之號
晉武踐祚遂正文考之稱比擬未必盡同追崇蓋有彝典顧惟寡
昧嗣續基圖天付有家動欲繩其祖武者若作室今曷致其孝思
欽惟皇考皇帝元德溫恭聖功果育顯諸神而藏用膏其施而未
光當夫預國政親軍旅之時無非審治體得民情之事弭兵日本
廣先皇柔遠之仁立教天庠示聖代崇儒之意身衛斯文于不朽
人被其惠而莫知誠以鋤奸去惡而爲明匪徒視膳問安之爲孝

乃有其德而無其位獨豐于功而裔于年感十載霜露之懷永言

維則紹一統乾坤之業有開必先思貽令名允為首議謹奉冊寶

上尊諡曰文惠明孝皇帝廟號裕宗有嚴吉享用薦徽稱伏惟神

靈歆其昭格

見義蒙集張伯淳撰

四川散毛洞主覃順來貢升其洞為府己巳

改皇太后所居舊太子府為隆福宮詹事院為徽政院乙亥命札

散知樞密院事加御史大夫月兒魯太師知樞密院伯顏太傅樞

密副使月赤察兒太保戊寅立捕鹽人賞格六月庚辰朔日食庚

寅減雲南歲貢馬復以鐵木兒平章政事甘肅饑禁釀酒乙未以

加上尊諡詔天下免所在本年包銀俸鈔及內郡地稅江淮以南

夏稅之半己亥封乳母楊氏為趙國安翼夫人何氏為冀國夫人

辛丑禮宋使家鉉翁遣還家

鉉翁充祈請使至燕安置河間至是年踰八十乃賜衣還歸

甲辰詔脩世祖

實錄丙午太陰犯井秋七月己未立保定路之博野泰安州之新

泰平陽路之武鄉芮城陵川蒲縣改侍衛都指揮使爲隆福宮左

右都威衛使壬戌詔中外崇奉孔子

按聖獻王所著通鑑博論于至元十八年有云帝信桑門之惑盡焚中國道藏闕儒

道二教爲外學援孔子爲中醫尊桑門爲正道及考元史止于是年焚燬道書而不見所謂既戊孔子之賢惟成宗卽位卽詔崇奉孔子則當朝或有施行如博論所云者故因所疑而識之

辰罷肇州宣慰司入遼東道減八番等處所設官三百一十六員

按八番新附時額九十萬戶設官四百二十四員及遣官覈實止十六萬五千餘戶故減其半

癸酉以不忽木段貞並平章政事

詔諭暹國王敢木丁來朝或有故則令其子弟及陪臣入質命太

師月兒魯將兵守北邊八月庚辰太白晝見戊子初祀社稷用堂

上樂歲以爲常已丑遣范文虎監浚通惠河立新河運糧千戶所

戊申太陰犯畢太白犯軒轅九月丁巳太白經天丙寅太陰掩填

星辛未犯軒轅乙亥犯平道遣禿古鐵木爾等使閣藍冬十月辛

巳詔凡蠲免田租令佃戶應輸田主者亦如所蠲之數毋得私收

壬午太白犯左執法癸巳太陰掩填星乙未犯井金齒孟愛甸渠

長遣子來朝卽其地立軍民總管府辛丑詔京畿糧儲充足歲海
運米百萬石者今減十之七帝諭省臣曰中書職務卿等皆懷怠
心又不約束吏曹使選人淹滯桑哥雖姦邪然僚屬憚其威政事
無不立決卿等其約束曹屬有不事事者笞之乙巳遣南巫里速

木答刺繼沒刺弓毯陽使者各還國

初征瓜哇時常招潑海南巫里等國遣人來
附以禁商泛海留京師至是弛海禁始遣還

十一月丁未朔帝朝皇太后于隆福宮上玉冊玉寶己酉太陰犯

亢壬子罷江淮湖廣江西行樞密院併入行省庚申太陰犯畢令

河西僧人依舊助役毀宣政院所刻河西藏經板甲子以何瑋參

知政事罷海北海南市舶提舉司立覆實司癸酉太白犯房詔改

明年爲元貞元年十二月癸未歲星犯房丁亥犯鉤鈴壬辰太陰

犯鬼庚子犯房又犯歲星用帝師奏釋京師大辟三十人杖以下

者百人賜諸鰥寡貧民鈔二百錠曲靖澂江普安等路焚官各以

方物來貢是月太傅伯顏卒

按是歲節氣正月一日壬子立春二月二日癸未驚蟄三月三日癸丑清明四月四日甲申五月五日甲

寅芒種六月六日乙酉小暑七月七日乙卯立秋八月八日乙酉白露九月九日丙辰寒露十月十日丙戌立冬十一月十一日丁巳大雪十二月十二日丁亥大寒

元貞元年乙未春正月癸丑命只兒合朗為御史大夫乙卯太陰

犯填星及畢壬戌以國忌即大聖壽萬安寺飯僧七萬詔道家復

行金籙科範乙丑以行院既罷仍賜行省長官虎符領其軍庚午

以楊炎龍為中書左丞阿老瓦丁呂天麟並參知政事壬申立北

庭及曲先塔林二都元帥府癸酉歲星犯東咸罷瓜沙二州屯田

二月丁丑翰林學士承旨留夢炎請老厚賜遣之壬午罷江南茶

稅增鈔三千錠入江西歲額

典章云令有司勸茶戶種茶以時採摘仍禁放牧損壞

癸未熒惑犯大

陰戊子思州田曷刺不花雲南爨卜木四川洞主查閭王金齒帶

梅混冬等來覲壬辰太陰犯平道癸卯犯歲星勅廉訪司官令省

臺同選三月乙巳朔發鈔五萬錠市馬給貧乏軍庚戌太陰犯填

星壬子禁來朝官歛所屬俸錢戊午罷福建徽州銀場提舉司以
東作方殷停諸不急營造壬戌地震太陰犯房丙寅增置蒙古學
正以各道廉訪司領之夏四月勅上都大都揚州從前撥賜大乾
元寺大興教寺大護國仁王寺酒店湖泊出辦錢物仍聽官收分
給毋許僧道私設人員

見典章

庚寅太陰犯東咸癸巳遣烏撒同知

牙那木假兵部尚馬使馬荅兒的陰庚子立衛候掌謁掌儀掌饈
諸司及官正內宰隸隆福宮癸卯設各路陰陽教授仍禁陰陽人
不得游諸王駙馬之門

典章云試選陰陽教授占算三命五星周易六壬數學

閏月癸丑歲星犯房

甲寅太陰犯平道乙卯犯亢丁巳掩房己未罷打捕鷹房總管府
及司籍周用薄斂等庫爲皇太后建佛寺于五臺山立校釐招討
司蘭州河清三目上下三百餘里五月庚辰詔各省存儒學提舉
司一其餘悉罷升江南諸縣爲州以戶爲差戶止四五萬者爲下

州五萬以上者爲中州下州官五員中州官六員凡爲中州者二十八下州者十五又以連州戶不及額降路爲州辛巳罷行大司農司加麥木丁平章軍國重事何榮祖爲昭文館大學士議中書省事甲申免自今五月以前逋欠錢糧丁亥太陰犯南斗六月壬子世祖實錄成甲寅併左右兩江宣慰宣撫二司爲廣西兩江道宣慰司都元帥府治靜江仍分司邕州癸亥立蒙古軍都元帥府于西川徑隸樞密院庚午立西域衛親軍都指揮使司勅凡上封事者命中書省發視然後上聞秋七月乙亥准江南地稅輸鈔丁丑太陰犯亢巳卯詔舉中外儒吏兼通者每道歲貢二人省臺立法考試中程者用之所貢不公罪舉者定職官坐贓經斷再犯者加本罪二等倉庫官吏盜所守錢糧一貫以下笞十貫杖二十貫加一等一百二十貫徒一年每三十貫加半年滿三百貫者死計

賊以至元鈔爲則

典章云官員因事受財枉法者不叙不枉法者殿罷三年方聽告叙再犯者終身不叙凡遇公私罪犯上司不得擅斷決

甲申歲

星犯房八月己酉太陰犯牛壬子犯壘壁陣己巳以駙馬郅懷知

樞密院事九月乙亥用帝師奏釋大辟三人杖以下四十七人已

卯運米十萬石于權場故廩以備北塞省寧夏行省八甘肅甲午

太陰犯軒轅戊戌犯平道冬十月癸卯有事于太廟帝曰親享之

禮祖宗未嘗舉行朕將躬祀之命獻官迎導入廟奉世祖裕宗冊

寶納諸各室

先附廟時以綾代玉冊至是始造成故並納之

甲寅勅自今監察御史廉訪使有所

按覈州縣官與本路同鞠路官與宣慰使同鞠宣慰司官與行省

同鞠辛酉辰星犯房壬戌犯鍵閉

通考云江西省臣言銀治歲課萬二千兩而未嘗及數民不堪命自今從實辦之不爲額

戊辰太白晝見太陰犯房十一月甲戌太白經天立江浙金銀洞

治轉運司乙酉太陰犯井丁亥犯鬼戊戌升江西寧都會昌二縣

爲州十二月丙辰太陰犯軒轅甲子犯天江丁卯禁諸王駙馬輒

召有司官吏減海運工費鈔一貫每石計六貫五百文著爲令是月立皇后伯岳吾氏初命郡縣通祀三皇如釋奠宣聖禮伏羲以勾芒氏配神農以祝融氏配黃帝以風后力牧配俞跗以下載于醫書者十人從祀兩廡有司春秋行事以醫師主之

通考云元貞間建三皇廟內有三皇

并歷代名醫像東有神機堂內置銅人鍼灸圖二十有四凡五臟旁注爲溪谷所會各爲竅以導其源委又刻鍼灸經于石其碑之題篆則宋仁宗御書至元間自汴移此

是歲帝

以京師米貴益廣糶法設肆三十所發米七萬石糶之後增至四十萬石每爲豪強巧取乃命有司籍貧民戶數驗口給之減時值三之一

二年丙申春正月己卯上思州叛賊黃勝許攻剽水口思光寨湖廣行省調兵擊破之勝許復入交趾壬午太陰犯輿鬼丙戌太白晝見安西王傳請立王相府帝曰去歲阿難荅已嘗面陳朕諭以世祖定制今復奏請豈欲以四川京兆悉爲彼有耶賦稅軍站皆

夏延所司今姑從汝請置王相府惟行王傳事丁亥太陰犯平道
庚寅犯鉤鈴命禿赤爲御史大夫乙未回紇不刺罕獻獅豹藥物
二月己亥朔自六盤山至黃河立屯田置軍萬人辛丑立中御府
丙午禁軍將擅易侍衛軍蒙古軍以家奴代役者罷職仍令其奴
別入兵籍畀以本主資產之半軍卒擅更代及逃歸者死丁未太
陰犯井括蒙古戶漸丁充行伍

孩幼稍長之下也

三月壬申以不忽木爲昭

文館大學士平章軍國事還太原平陽路葡萄園爲民業罷四川

馬湖路所進獨本葱癸酉有言晉王甘麻剌及太師月兒魯有異

圖者樞密院鞠之無驗帝命言晉王者死言太師者謫從軍乙酉

太陰犯鉤鈴夏五月戊辰朔免兩都徭役甲戌詔民間馬牛百取

其一羊不滿百者亦取之惟色目人及數方取丁丑太陰犯平道

庚辰土番叛掠階州遣兵討之庚寅禁諸王駙馬招戶令有分地

功臣戶與民均納供需詔諸徒役者限一年放歸毋杖六月乙巳

太白犯天關以調兵妨農免廣西今年田租丁巳太白犯填星癸

亥太陰犯井秋七月癸酉茶鹽轉運司印鈔提舉司運糧漕運司

官以三年爲代雲南福建官吏滿任者准給驛歸壬午填星犯井

太白犯輿鬼

續資治通鑑長編云勅官吏受賂初既辭伏繼審覆而有司徇情致多狡辨者加等論罪

己丑命行臺御史鉤校隨

省理問所案牘諸提調錢穀官所部有逋欠者勿遷叙八月丁酉

朔禁舶商毋賫金銀過海諸使海外者不得爲商立肇州屯田萬

戶府庚子太陰犯亢太白犯軒轅癸卯太陰犯天江乙巳立捕盜

賞格凡告捕強盜一名者賞鈔五十貫竊盜半之應捕者又半之

皆徵諸罪人無可徵者官給乙卯太陰犯天街太白犯上將龍興

路隕霜殺禾九月戊辰太白犯左執法壬申太陰掩南斗甲戌罷

民間鹽鐵爐竈命沿海巡禁私鹽定浙東福建湖廣兩稅法秋稅

止輸糧夏稅則雜以木棉布絹絲綿土物丁丑太陰犯壘壁陣甲
申雲南乞藍部長荅刺率諸蠻來降以其地爲雲遠路己丑太陰
犯軒轅河決杞封丘祥符寧陵襄邑五縣贛州賊劉六十聚衆萬
餘建僞號江西左丞董士選討平之冬十一月丁卯蠻洞荅馬刺
一本王遣其子進象十六丁丑太陰犯月星及天街庚辰犯井丁
亥犯上相增明年海運糧爲六十萬石調芍陂屯田軍萬人修大
都城戊子太陰犯平道壬辰犯天江省雲南柏興府入德昌路十
二月戊戌立徹里軍民總管府本古達里蒙
字訛作車里復置蒙棣剛等甸軍民
官癸卯定諸王朝會賜與太祖位金各千兩銀七萬五千兩世祖
位金各五百兩銀二萬五千兩餘各有差丁未太陰犯井乙卯犯
進賢復司天臺觀星戶增置侍御史二員釋在京繫囚百人
大德元年丁酉春正月辛卯以王慶端爲中書右丞張斯立叅知